



UNIVERSITÄTS-
BIBLIOTHEK
PADERBORN

Universitätsbibliothek Paderborn

Jacobi Usserii Armachani Annales Veteris Et Novi Testamenti

Ussher, James

Lutetiæ Parisiorum, 1673

De Philippo Principe Palatino ad Rhenum, Philippi Melanchthonis Narratio.

urn:nbn:de:hbz:466:1-14425

DE PHILIPPO PRINCIPE PALATINO

ad Rhenum, Philippi Melanchthonis

Narratio.



Æpe audiui narrare Capnionem, cùm apud Philippum principem Palatinum electorem essent Dalburgius episcopus Vangionum, Rudolphus Agricola & ipse, & non solum in familiaribus colloquiis, sed etiam in deliberationibus de republicâ sepe narrarent insignia exempla vel Persica, vel Græca, vel Romana; mirificè accentum esse principem studio cognoscendæ historiæ, sed dixisse, se animadvertere, distinctione temporum, gentium & imperiorum opus esse: eamque ob causam petivisse, ut sibi ex totâ antiquitate, quantum nota esset, ex Hebræis fontibus, & ex Græcis ac Latinis scriptoribus, ordine contexerent monarchias; ut mente complecti tempora mundi, & seriem maximarum mutationum posset. Nulli tunc extabant scripti linguâ Germanicâ libri de veteribus imperiis. Nec Latinâ præter Justini confusaneam epitomen, quæ tamen distinctione temporum caret, habebantur. Erat ocium tunc illis doctis viris, & hoc labore delectabantur. Ordine igitur ex Hebræis, Græcis & Latinis monumentis monarchias recensent, & maximè digna memoriâ suo loco adhibita temporum & gentium distinctione inserunt. Legit avidissimè id scriptum princeps ingeniosus, seque lætari dicebat, divinitus conservatam esse temporum seriem, & rerum præcipuarum memoriam. Ostenderant enim ei continuatam esse mundi historiam ita, ut Herodotus inchoet suas narrationes paulo ante finem propheticæ historiæ. Nam & ante regnum Persicum, de quo narrationes luculentæ extant in Daniele, Esdrâ & Nehemiâ, regum Assyriorum & Ægyptiorum aliquot nomina sunt eadem in prophetis & Herodoto. Apri prædixit exitium Jeremias, quod describit Herodotus. Postquam Jeremiam interfecit Apries, postea Amasis captum regem superbum strangulat. Agnoscere etiam se princeps Palatinus dicebat testimonia præsentis Dei in constitutione monarchiarum, quia solis humanis viribus constitui & retineri non potuerint, & eò divinitus constitutæ sint, ut essent custodes humanæ societatis, conjungerent multas gentes, restituerent leges, judicia, pacem, ut docere homines de Deo possent. Sæpe igitur repetebat Danielis verba: *Deus imperia transfert & stabilis*. Mutationibus etiam & tyrannorum pœnis dicebat conspici iudicium Dei, & moneri totum genus humanum illustribus exemplis; ut agnoscat Deum, sciat ordinasse eum & velle iusta & verè irasci violentibus ipsius ordinem. Tales erant ejus principis sermones, considerantis ordine imperiorum incrementa & ruinas.

Circa annum Christi 1480.

Dan. 2. 21.

